

Geoffrey Wever ta keda como minister, maske e no ta cu partido coalicion mas

Ayera durante conferencia di prensa di prome minister, Evelyn Wever-Croes, (MEP), e mandatario a elabora riba e posicion di minister demisionario di Asunto Economico, Sostenibilidad y Comunicacion, Geoffrey Wever, despues cu el a anuncia su retiro di partido Raiz.

Riba e pregunta di prensa, kico ta e status di minister Geoffrey Wever ken recientemente a retira for di partido di coalicion Raiz, prome minister a expresa cu “honestamente nos a wak su esey ta

bin, e no tabata un hende cu tabata mucho contento cu e parlamentarionan di Raiz den kibra nan mes den palabracionnan cu nos a haci y bo tabata weita n’e e momento eynan cu e no tabata mucho contento.”

Partijraad di Raiz a pidi Wever pa e keda como minister y esey ta un carta cu prome minister a haya recientemente manera el a sigura, “mi mester un declaracion por escrito di e dos parlamentario, Misha Raymond y Raymon Kanperveen cu nan ta sostene Geoffrey Wever como min-

ister pa Raiz, mas cu e no ta parti di Raiz mas.”

Asina mes, el a enfatisa cu e mester haci un distincion den esaki pero cu mester enfoca riba ley, kico ta legalmente e situacion y legalmente e situacion ta cu si tin un hende cu ta minister y e tin sosten di e mayoria den parlamento, e por keda minister.

P’esey tabata importante pa sa di e dos parlamentario di Raiz ta sostene Wever pa Raiz y e ora ey e ta keda como minister.



Rocco Tjon lo reuni cu director y instancianan di e carteranan di Glenbert Croes

Despues cu prome minister Evelyn Wever-Croes ayera mainta a anuncia cu minister Rocco Tjon ta esun cu ta bay tuma na su encargo e cartera di Labor, Energia y Integracion despues di retiro di ex-minister Glenbert Croes, el a elabora un poco mas riba otro temanan den un conferencia di prensa.

“Pa garantisar continuidad di procesonan den Gubernacion, ta encarga señor Rocco Tjon, actual minister di Husticia y Asuntunan Social, cu e cartera di Labor, Energia y Integracion. Esaki pa motibo cu e cartera di minister Tjon tin mas punto en comun cu e cartera di Labor, Energia y Integracion por ehempel, e tema di permisonan cu tin similaridad cu e cartera di Husticia di minister Tjon,” el a anuncia.

Manera ta conoci, dia 9 di september ultimo minister nan di e partido gobernante MEP a entrega su retiro y na e momento ey su Excelencia Sr. Gobernador, Alfonso Boekhoudt a pidi nan pa keda ehecuta e funcion y atende solamente cu asuntunan coriente “aworaki cu pa otro motibo Glenbert Croes a entrega su retiro cual ta keda inmediato, nos ta entrega Sr Rocco Tjon e ora cu e asuntunan coriente di e cartera aki,” prome minister a sigura.

Den proximo siman, minister Tjon lo reuni cu director di departamentonan y instancianan cu ta resorta bao Labor, Energia y Integracion pa nan por cumpli cu nan compro-



miso cu a pesar cu gobierno a cay “nos ta percura pa nada tranca y nos por sigui bay den rumbo positivo cu Aruba ta bayendo aworaki,” el a bisa.

Tambe, el a indica cu tabatin e posibilidad di reparti e tres cartera aki pa otro minister nan pero e consejo ey tabata negativo pa loke ta trata presupuesto, asuntunan logístico y di ley.

Ademas, el a señala cu e motibo principal di pakico minister Glenbert Croes a entrega su retiro ta pa motibo di “Integridad” y pa loke ta e caso Portulaca mes ta Ministerio Publico tin e papel principal den esaki, sin embargo “nan no a bisa ainda exactamente ta kico nan ta investiga of kico nan ta sospecha e ex-minister di dje y nos ta spera cu Ministerio Publico pronto por duna claridad riba kico ta exactamente lo cual cu ta wordo sospecha of investiga.”

“Detencion y privacion di

libertad tabata legal y e sospecho di soborno contra di dje ta serio”

Den mesun linea aki, Ministerio Publico a manda un comunicado di prensa indicando cu ayera diabierna 11 di october “ex minister di Labor, Energia y Integracion, Glenbert

Croes, a keda presenta dilanti di hues comisario como sospechoso den e investigacion Portulaca. Hues comisario a dicidi cu e detencion y privacion di libertad tabata legal y cu e sospecho di soborno contra di dje ta serio.

Pesei hues comisario a ordena e detencion preventivo di e sospechoso cu despues a wordo suspendi. Esaki ta nifica cu por lo pronto a laga e sospechoso den libertad, pero cu e mester mantene su mes na algun condicion cu hues a impone riba dje. Un di e condicionnan ta cu e sospechoso mester cumpli na yamadan di polis y husticia.



“Den nos partido, si un hende ta bira sospechoso bo ta tuma bo retiro”

Prome minister tambe a enfatisa cu Glenbert Croes ta e prome politico cu ta tuma su retiro a raiz di un investigacion penal, esaki basa riba palabracionnan cu nan a haci caba den Gabinete Wever-Croes I “den nos partido esaki ta e palabracion, cu si hende bira sospechoso bo ta tuma bo retiro y tambe el a wordo hancra den ley na aña 2021, cu e minister ta entrega su retiro asina cu e por y den e caso aki, Glenbert Croes a entrega su retiro inmediatamente na momento cu el a wordo deteni,” el a expresa.

Igualmente, el a indica cu nan a ricibi preguntanan di con e mester a tuma e paso ey pa motibo cu tin casonan mas recien di otro politiconan cu no a tuma nan retiro, a pesar cu nan a bira sospechoso “akinan nos ta referi na Marisol Tromp cu a bira sospechoso

den porta di eleccion di aña 2021, a keda sospechoso pa dos aña y no a tuma su retiro como politico ni como parlamentario y tambe Benny Sevinger cu tambe tabata sospechoso y a wordo condena caba, ainda tur dos siendo sospechoso nan a keda den parlamento, nan no a retira y nan a participa den ultimo eleccion,” el a sigura.

Den su opinion, prome minister a enfatisa cu Glenbert Croes “a trece cambio den esaki” pa motibo cu e simpel hecho cu e dos parlamentario “sospechoso” a keda den parlamento, como politico y riba lista “a crea conmocion den nos comunidad.”

Prome minister tambe e trece dilanti cu Glenbert Croes ta mantene su inocencia y e lo defende su mes” pa e motibo ey mester di espacio pa e bay dedica su mes na su defensa y cu “e no kier mancha ni un gobierno ni parlamento.”